

Lëtra ala jonëza de nosta diozeja

Cares jones, cari jogn!

Te de plü incuntades y discusciuns ëise partí cun me ostes esperiënzes y üsc pinsiers. Osta sinzirité y osta confidënza m'é jüdes a cör y me fej gonot ponsé a os. Al me vëgn en mënt osta ligrëza de vire, osta atenziun por la familia y por i amisc, ince üsc pinsiers y osc incherscimun do respostes ales domandes de osta vita y do n significat che tëgn döt adöm.

Datrai án l'impresciun che os jogn d'aldedaincö l'ëis plü saurida: feter düc á chiló da nos les cosses nezesciars por vire, al é de bones poscibilités de formaziun, al vëgn pité tröp por le tëmp lëde te na beliscima natöra y al é tan d'atres poscibilités ch'i ëis ma bria da chirí fora. Mo sce an ciara plü avisa s'intënon atira che al é gonot sciöche sce i fosses sön na slackline. Da odëi les dificoltés, i dübi y les poscibilités contraditores él da ciáfé n travert che dëida tigní la balanza amesa les malsigurtés y les tröpes domandes che manacia da ves architè sö. Ciun di tröc trus é pa le dërt? Co pó pa garaté mia vita y co pói pa porté ite mies capacités? Co sunsi pa bun o buna da costruí mia esistënza, da formé na familia y da fistidié por ëra? Co pói pa ciáfé n laur che vá bun por mies capacités y mi dejiders y che me garantësc na basa de vita? Y spo le progres technich che se porta, dlungia düc i vantaji, ince la domanda alarmanta sce nos sun bëgn bugn umanamënter da tigní le vare cun les poscibilités techniches, por che avisa chësc svilup technich ne ti a robes nia ala porsona súa capacitè de raport y súa dignité. Insciö sintise te chësc nosc monn, cun döt che vá alasvelta y cun sües ghiranzes desvalies, ince na gran presciun che pësa sön tröc de os.

Sc'i ojun spo l'odlada, sura nüsc paisc fora, al monn, spo pé val' situaziun zënza speranza. I odun conflic dürs inanter popolaziuns, porsones te soferënzes nia da s'imaginé, tla meseria y zënza n daciasa. I aldiun de catastrofes ambientales y de desdruziun dla natöra, i aldiun de terrorism, violënza y coruziun. Y döt chësc ne sozed nia ma invalgó dalunc da nos, mo ince chiló pro nos y inanter nos. Te chisc momënc ne me sál nia demorvëia che jënt jona se rassegnëies, ne vëighes nia plü prospetives por le dagní y perdes la speranza.

Speranza y coraje

Tl medem tëmp sënti ince osta orenté sterscia, osc dejider do mudaziun, do n monn miú, plü iüst, che garantësc n dagní y chësc me dá speranza. Y porté da chësta speranza ves diji a os: Avede coraje! Infidesse! Os sëis la tle dla mudaziun! No ti lascede lerch ala desperaziun te üsc cörs y no lascede pro che rassegnaziun se fejes lerch te osta vita. Al contrar: Avede coraje y metede man cun le pröm vare!

Indlunch sön chësc monn y ince chiló da nos él sté porsones, che ti á fat tru cun de pici vari a valch de gran. Ciarresse intoron, te osta vita da vignidé, tles esperiënzes ch'i fajëis de por de, cun n'odlada atënta y cun n cör davert y metede man pro ci ch'i incuntëis!

Dignité

Y sc'i damanëis ci che ves dá orientamënt y ci ch'é important, spo lascesse sön osta sensibilité por la dignité umana, sön osc dejider do relaziuns che garetá, do amizizia y l'ester chiló un por l'ater. Jide do chi trus che ti dá la poscibilité ala jënt de nüsc paisc y sura döt le monn da vire tla liberté.

Al é la liberté le post, olache vigni porsona pó svilupé süa particularité. Y al é ince la liberté che nes sbürta a surantó responsabilité. Mo ci ó pa dí responsabilité? Responsabilité ó dí se formé na minunga y la defëne, chirí fora ci ch'an á reconesciü sciöche bun y dërt y le mëte en pratica, por che le monn sides n pü miú doman y ais n aspet plü uman. Ince sc'al ne pé nia datrai insciö: vignöna y vignun de os pó möie valch! Infidesse! Viede osta responsabilité! Ciarede sciöche ince le bun vá so tru sura döt le monn, deache porsones mët man cun de pici vari dër concrec da fá le bëgn!

Solidarieté

Degügn de nos ne pó vire da se instës. Cun nosc ester porsona depenunse da valgügn che s'un tol sura de nos. Chësc vëgn dantadöt desmostré - mo nia ma - tl mëteman de nosta vita. Os ëis n sentiment dër sot por chësc, sc'i sotriessëis tres indô tan importantes che familia y amizizia é te osta vita. Ti jí pomez a d'atres porsones y ester solidai cun ëres canche ares ves adora, chësta é la resposta a döt ci ch'i un ciafé, nia mirité y debann, te nosta vita. Chësta afeziun ne ti vá nia ma ales porsones ch'é liades a nos tres i raporc familiars o de amizizia, no, chësta afeziun ti vá a dotes les porsones ch'é tla meseria y adora nosc aiüt - chësta é espressciun plü sota dla dignité umana! N'él nia da se sperde y da ciafé coraje tl medem tëmp da odëi che al foss assá da vire por tan de porsones, sc'ara jiss da partí sò plü iüstamënter les ressurses y da mudé datrai nosta manira de consumé, olache tan tröp vëgn ince sciuré demez?

Y impó: i m'implësci de speranza y reconescënza, canche i vëighi tan ch'al ves stá a cör che al vëgnes fat de plü iustizia tl monn y tla sozieté, canche i vëighi tan tröc de os ch'é arjigná da partí y da daidé. Nia püc de os scinca ince chiló da nos tëmp y forzes por ti sté dlungia a porsones che adora aiüt, sides tres uniuns y assoziaziuns, organisaziuns d'aiüt, tres aziuns de solidarieté, co ince tl chit dailó olache al vëgn adoré tla vita da vignidé n cör davert y na man che dëida.

Scomenciadia personala y bëgnester publich

No aspetede che al sides chi che comana o i "potënc" a ciafé soluziuns por i problems, mo ciarede ci ch'i podëis os fá bele incö! I podëis bele incö tó la dezijiun da anuzé i mesi de trasport por sconé l'ambiënt y prodüje de manco refodam, i podëis bele incö tó la dezijiun da cumpré quant - magari nia dagnora, mo canche ara vá - fat da porsones che ne mëss nia mëte süa sanité o süa vita al prigo, mo che pois avëi na vita dignitosa. I podëis bele incö mëte averda da promöie cun osc comportamënt n svilup economic iüst y a condiziuns de vita dignitoses che nes conzed nia ma a nos mo ince ales generaziuns che vëgn n dagní. I podëis incö anuzé y adoré osten capacités, osten conescënzes tecniches, linguistiches, culturales, osten ideas y osta creativité y insciö dé osc contribut por la soluziun de problems, n contribut che degügn ne pó dé insciö, sciöche os!

Da vire insciö y da fá aladô ne ves realisëise nia ma os instësc, mo i formëis ince la sozieté y le monn te na manira ch'è cristiana. Sciöche vëscò ves diji che chësc ti dá espresciun a ci che i ti dijun vocaziun cristiana. Da vire insciö ti jëise do ala cherdada de Dî che ne vëgn nia sciöche n traní che toma dal cil y ince dainré te na usc fora dal nia, mo che se realisëia sciöche na cherdada de vita tles speranzas y ligrëzes, tla plüra y tëma dla vita da vignidé. Che i orëis ti dé na resposta a chësta cherdada me implësc, adöm ince a tröpes porsones chiló da nos, de ligrëza, de speranza por le dagní dl monn y le dagní dla dlijia y de reconescënza.

Insciö nes aodi a nos dötes y düc che le tru cuntra la Pasca nes implësces de speranza nöia dailó olache i un pordü la speranza y cun le coraje da nes lascé condüje da nosc incherescimun, por che dötes les porsones ais la vita en abundanza. I ves salüdi tla crëta che Un vëgn cun nos do düc nüsc trus y nes scinca so amur.

De cör ves sunsi dlungia

osc vëscò

+ Ivo Muser

Balsan, ai 11 de merz 2018, IV domënia de Carsëma